

111 年度東門國小校內語文競賽客語(海陸腔)朗讀篇目一

編號 1 號

【生趣个童年】黃美貞原作

還細時節，細人仔無科技產品好搞，該時，屋簷下、杌仔樹、伯公下、大圳溝、竹林，做下都係佢兜个遊戲場所。

佢四姊妹，還過隔壁鄰舍个細姪仔，長下湊等份家啦、打紙擲仔¹摺搞園人尋等等，係堵著毋使讀書个下晝頭，定著搞到斷烏，等到大人擎等竹修仔來尋細人仔，大家看著毋像勢正溜瀉。

係好天好時，佢這兜乜好在圳溝肚覓蜆仔。有一擺，沙鼻个老弟麥麥滾²，打賭佢捉得著細蝦公，上屋个阿賢好擲擲仔應：「該愛仰般賭？」老弟誚燕³佢：「你係捉比佢較多，暗晡夜佢請你食夜。」阿賢堪毋得人激，應講：「好！無問題！」該下晝，佢兜先攔水窟，想摺蝦公錫到水窟肚，毋過，細蝦公哪有恁該捉，兩下半蝦公就躍走咧，佢這兜試著無意思，早就走淨淨。無想著佢兩儕毋認輸，目珠眨都無眨，搥到歸身潦潦、局局糟糟合泥了了，水窟肚斯兩、三尾細魚仔定定，等到斷烏咧，暗摸胥疏，正遽遽轉屋，管佢麼人輸贏？係還毋轉屋，毋單淨無飯好

食，還會賺一身皮肉痛。

又有一日，翕燒个下晝頭，佢兜兄弟姊妹在屋下四圍搞園人尋。老弟係搞頭王，哪位都尋得著來園，搞幾下輪乜搞毋會煞。無想著坐在屋簷下个阿婆大聲喊：「遽遽轉來！毋好在該頭牛眼樹下搞，該位盡多草鞋嫲⁴哦！」頭擺个細人仔輒常打赤腳搞到毋知晝暗，天天个佢這兜，無摺阿婆个話聽入耳，結果做鬼捉人个老妹突然間看著該生到烏疏疏，有十過公分長个弄毛蟲，對等佢趕等過來，嘎走到尾瀉屎！還「哇——」聲嗽出來。好搞个老弟，興蹠蹠仔行兼去想追該尾草鞋嫲，阿婆煞煞咄講：「你係分佢趕到臉身去，斯會像貓抱菜耙——難敲爪⁵哦！」

「良言莫嫌少，朋友莫嫌多。」還細時節跔等同學伴摺隔壁鄰舍个細姪仔弛崗打牌，滿哪仔都係佢這兜共下行過个腳跡、看過个景色、搞過个生趣事，係佢這兜細人仔當懷念个童年，該兜生趣个回憶摺畫面，永久都會留在佢个腦膈肚。

¹ 紙擲仔：音 zhi' piag er；紙牌，指孩童時期玩的圓形紙牌。

² 麥麥滾：音 da' da' gun'；誇言也。

³ 誚燕：音 sau' nad；嘲笑譏刺。

⁴ 草鞋嫲：音 co' hai ma；攀附在樹枝上全身長滿毛刺的毒毛蟲。

⁵ 敲爪：音 lud zau'；本指爪子脫落，後亦借指人脫離困境或陷阱。